

## **Tulafono mo Fuainumela Fakamaumau 2013**

### **1 Igoa**

Ko na Tulafono ienei mo Fuainumela Fakamaumau 2013.

### **2 Fakauigaga**

I loto o na Tulafono ienei –

“fakamaumauga tau galuega” ko tona uiga ko he lihi o ni fuainumela fakamaumau, e mafai ke kikila ki ei ko ni fakamatalaga e maua ai ni fuainumela fakamaumau aloakia;

“Malo Fakaauau” ko tona uiga ko te Malo Fakaauau o Tokelau;

“fale” ko tona uiga ko he fale pe he fakatoho, e tuha pe tumau pe fakavaitaimi, e fakaaoga katoa pe he vaega ke nonofo ai ni tino; e aofia ai he vaka pe he vakalele i ho he fenua o Tokelau, pe i he vaega i te va o na fenua iena;

“pepa fakatumu” ko tona uiga ko ho he tuhi, tuhituhiga, pepa fakatumu, pepa fakamatalaga, lipine, papehe e teu ni fakamatalaga , pe he mea faigaluega fakaonopo nei e teu fakamatalaga ko na fakamatalaga e fakaulu pe puke pe manakomia ke fakaulu pe puke mo te mafuaga tau fuainumela fakamaumau i lalo o na Tulafono ienei;

“mataeke a te malo” ko tona uiga ko ho he mataeke, fakalapotopotoga, pe he lala o te Malo o Tokelau e aofia ai ho he nuku;

“Minihita” ko tona uiga ko te Minihita mo Fuainumela Fakamaumau;

“Ofiha” ko tona uiga ko te Ofiha o Fuainumela Fakamaumau a Tokelau;

“fuainumela fakamaumau aloakia” ko tona uiga ko na fuainumela fakamaumau na tuku fakatahi mai he hakilikiliga tau fuainumela fakamaumau i lalo o na Tulafono ienei, ma na fakamaumauga tau galuega ma na fakamaumauga tau lehitala ma ietahi fakatulagaga, na iloiloga o na fuainumela fakamaumau e fakalauiloa mahani e na mataeke a te malo, pe mafai ke fakalauiloa mahani e he mataeke a te malo;

“hakilikiliga tau fuainumela fakamaumau” ko tona uiga ko ni hakilikiliga o ni fakatinoga, pe o tagata i Tokelau, e taku mai ai ko na fakamatalaga e fakamaopopo mai tagata uma i loto o he malae na fai

ai he hakilikiliga, pe ko he vaega o kilatou, e fakatino e he mataeke o te malo i lalo o na tulafono ienei, katoa pe mo te pogai oioti ke fakagaoioiga ma te kotokotoga e ni fakatinoga talafeagai tau fuainumela fakamaumau ma fakalauiloa na ola i ni auala tau fuainumela fakamaumau;

“fakalapotopotoga” ko tona uiga ko ho ni fakalapotopotoga tau pihinihi i Tokelau pe lautele pe tutautahi, pe ho he fakalapotopotoga e fakatino i Tokelau, pe he lotu, fakalapotopotoga a te nuku, akoga pe falemai.

### **3 Te tulaga o te Tino Fakauluulu O Fuainumela Fakamaumau**

(1) (i) E tatau ke tofia e te Malo Fakaauau te Tino Fakauluulu o Fuainumela Fakamaumau

(ii) Ko te Tino Fakauluulu o Fuainumela Fakamaumau ko te fakauluuluga ia o te Ofiha ma e ia te ia na tulaga, tiute ma na mafai e tuku atu ki luga o te Tino Fakauluulu o Fuainumela Fakamaumau e te Tulafono teni pe ko he tahi tulafono lava.

(2) Ko te Tino Fakauluulu o Fuainumela Fakamaumau e ia te ia te tiute o te faiga o he tonu agai ki na fekuikuifakiga pe ni metotia e fakaaoga i te fakatinoga o ho he hakilikiliga tau fuainumela e fakatino e te Ofiha, ma fai he tonu i te lahi, auala ma te taimi e fakalauiloa ai na hakilikiliga ienei.

(3) (i) E kehe ai i te palakalafa (2) e mafai e te Malo Fakaauau ke fakatonu te Tino Fakauluulu o Fuainumela Fakamaumau ke fakamaopopo pe taofi te fakamaopopoga o ni fuainumela fakamaumau patino.

(ii) E mafai e te Tino Fakauluulu o Fuainumela Fakamaumau ke fakailoa lautele ko ia na fakatonu ke fakamaopopo pe taofi te fakamaopopoga o ni fuainumela fakamaumau kafai e fofou ia ke fai.

### **4 Hokotaga ma ietahi mataeke a te malo**

(1) (i) E mafai e te Tino Fakauluulu o Fuainumela Fakamaumau ke fehili ki na mataeke a te malo mo ni fakamatalaga e uiga ki ni aitia, fakatulagaga, pepa fakatumu, metotia ma ni fekuikuifakiga na fakaaoga i ni fuainumela fakamaumau aloakia.

(ii) Ko te fakaululuuluga o na mataeke takitahi a te malo e tatau ke fakailoa atu e ia ki te Tino Fakauluulu o Fuainumela Fakamaumau ho ni fuainumela fakamaumau aloakia fou, pe ni huiga lalahi ki ni fuainumela fakamaumau aloakia agai ki a latou mataeke.

(2) (i) Ko te Tino Fakauluulu o Fuainumela Fakamaumau e fakataga ke kikila ki ho ni fakamaumauga tau fuainumela e teu e ietahi mataeke mo te pogai ke tuku fakatahi ai ni fuainumela fakamaumau aloakia e te Ofiha.

(ii) Ko na fuainumela fakamaumau mai na fakamaumauga tau galuega e fakaaoga e te Ofiha i na fuainumela aloakia e tatau ke teu kehe mai na fakamaumauga tau galuega ma ke amanakia ko ni fuainumela fakamaumau na fakamaopopo i lalo o na Tulafono ienei.

## **5 Galuega i loto o te Ofiha**

Ko ho he tino e faigaluega i loto o te Ofiha e ia mafaia oi fakatino na galuega; fakatino na mafai, ma i lalo o na tiute o te Tino Fakauluulu o Fuainumela Fakamaumau e ve o na fakatonu ai e te Tino Fakauluulu o Fuainumela Fakamaumau.

## **6 Tiute o te Tino Fakauluulu o Fuainumela Fakamaumau**

Ko te Tino Fakauluulu o Fuainumela Fakamaumau e tatau ke - (i) Fakamaopopo, tuku fakatahi, iloilo, fakalauiloa ma tufatufa, fakatahi ma ni fakamainaga pe heai foki, na fuainumela fakamaumau aloakia; ma

(ii) Fautua te Minihita e uiga ki ni matakupu tau fuainumela fakamaumau, ma galulue fakatahi ma ietahi mataeke a te malo i te tuku fakatahiga o te fautuaga; ma

(iii) Taulogologo te Minihita e uiga ki na polokalame tau fuainumela fakamaumau a ietahi mataeke a te malo, ma pe ko fea lava e talafeagai ai kafai e uma te talanoa ma te mataeke a te malo ke tuku atu he lipoti ki te Minihita i te pogai, metotia, ma te taua o ho ni fuainumela fakamaumau e iei i te taimi nei pe ni fuainumela fakamaumau aloakia e tau fakatu; ma

(iv) Tuku atu ni fautuaga ki na mataeke a te malo agai kia latou polokalame tau fuainumela fakamaumau ma fakalauiloa te amanakia o na taki tau fuainumela fakamaumau e na mataeke iena a te malo; ma

(v) Fakatalanoa ma ietahi mataeke a te malo te taua, te lautele ma na fekuikuiakiga, ma na tulaga o ho ni fuainumela fakamaumau ma tuku atu he lipoti ki te Minihita i te manakoga ke, lahi, ma te metotia o na fuainumela fakamaumau aloakia ma te tiute o te mataeke a te malo; ma

(vi) Fakamatala te uiga, ma fakalauiloa na taki mo te fakaaogaga o na fuainumela fakamaumau aloakia; ma

(vii) Iloilo ma tuku atu ni lagona ki te aoga pe ki te fakauigaga o ho ni fuainumela fakamaumau e kikila te Tino Fakauluulu o Fuainumela Fakamaumau e talafeagai.

## **7 Tuhiga Igoa o te aofaki o tagata ma na fale e nonofo ai ma te faitauga o te aofaki o tagata**

(1) Ko te Tino Fakauluulu o Fuainumela Fakamaumau e tatau ke: (i) Fakatulaga e ia mo te fakatinoga o te tuhiga igoa o te aofaki o tagata ma na fale e nonofo ai a Tokelau i te 2016 ma te taki lima tauhaga uma i tua mai; ma

(ii) Fakatulaga e ia te faitauga o te aofaki o tagata o Tokelau ki mua i te aho 31 Tehema i te tauhaga ki mua o he faiga palota a he nuku mo te pogai o te fakamaliega o na manakoga tau faiga palota o te Tulafono Faiga Palota a Tokelau

(2) Ko te aho e fakatino ai te Tuhiga Igoa o te Aofaki o Tagata ma na Fale e Nonofo ai ia Tagata a Tokelau e tatau ke fakatulaga fakalautele e te Tino Fakauluulu o Fuainumela Fakamaumau ka maea ai na talanoaga ma te Malo Fakaauau.

## **8 Takutinoga o te puipuia**

(1) Ko ho he tino e fakatino ni galuega mo, pe ni galuega mo te Tino Fakauluulu o Fuainumela Fakamaumau, pe faigaluega i te Ofiha pe ko he mataeke a te malo e tatau ki mua kae ko heki fakatinoa na galuega ke fai hana takutinoga o te puipuia mo te olaga katoa e fakaaoga ai te pepa e tuku atu i na fakatulagaga i na Tulafono ienei.

(2) Ko ho he tino, pe he tino faigaluega tautua a Tokelau pe heai, e ono fakataga i te fakatinoga o ona tiute mo Tokelau ke kikila ki ni fakamatalaga na fakamaopopo i lalo o na Tulafono ienei e tatau ke fai hana takutinoga o te puipuia mo te olaga katoa fakaaoga ai te pepa e tuku atu i na fakatulagaga I na Tulafono ienei.

(3) Ko ho he tino e fai hana takutinoga i lalo o te palakalafa (1) pe ko te palakalafa (2) e mafai ke tuku ko he tino e faigaluega i te Ofiha mo te pogai o na Tulafono 11(2), 11(3), 16, ma te 19(1) fakatatau ki te fakamaopopoga tau fuainumela na galue ai.

(4) Ko na takutinoga uma na fai mo te pogai o na Tulafono ienei e tatau ke teu fakalelei e te Tino Fakauluulu o Fuainumela Fakamaumau.

## **9 Fuainumela Fakamaumau Aloakia ma te Fakafoga**

(1) Ko na fuainumela fakamaumau aloakia e mafai ke fakamaopopo kae ke tuku atu ai ni fakamatalaga ki te Fono Fakamua, Malo Fakaauau, mataeke a te malo, Taupulega, fakalapotopotoga ma tagata

lautele mo te mafuaaga ke fai ai ni tonu ma ke fakafaigofie ai te taliagia o na matakupu tau atiakega, va feiloaki, tau ki tagata ma ietahi vaega taua.

(2) Kae ke mafai ai ke fakafaoe i te tulaga pito lelei, ma ke mafai ke fakaaoga fakalelei na fuainumela fakamaumau aloakia, ma ke nahe toe fakamaopopoa na fakamatalaga tutuha, ko na fuainumela fakamaumau aloakia uma e taukikila i lalo o na Tulafono ienei.

### **10 Hakilikiliga tau fuainumela fakamaumau ma na tuhiga igoa (1)**

Ko he hakilikiliga tau fuainumela fakamaumau pe he tuhiga igoa e fakatino e te Ofiha e mafai ke fakatino oioti i lalo o he fakatagaga tuhituhiga a te Malo Fakaauau, vagana ai e fakataga i lalo o na Tulafono ienei.

(2) E mafai e te Tino Fakauluulu o Fuainumela Fakamaumau ke tuhia ma fakatulaga he pepa mo te fakamaopoopoga o ni fuainumela fakamaumau e te Ofiha, ma takua ai na fakatonuga ma na fekuiakiga talafeagai ke lelei ai te tufatufaga, fakatumuga ma te toe fakafoki maiga o na pepa.

### **11 Malu puipuia o na fakamatalaga**

(1) Ko na fakamatalaga e tuku atu ki te Tino Fakauluulu o Fuainumela Fakamaumau i lalo o na Tulafono ienei e tatau ke fakaaoga oioti e te Tino Fakauluulu o Fuainumela Fakamaumau mo na mafuaga tau fuainumela.

(2) E heai he tino, vagana ai kilatou e talitonugia ko ni tino faigaluega i te Ofiha i lalo o na Tulafono ienei, e fakamafai ke kikila ki ni pepa mo ni tagata tautokatahi pe ho he tali ki he fehili na fakamaopopo i lalo o na Tulafono ienei, vagana ai mo te pogai o he fakahalaga i lalo o na Tulafono ienei.

(3) E kehe ai ma te pogai e takua i te palakalafa (2) e heai ni fakamatalaga i loto o he pepa mo ni tagata tautokatahi ma e heai he tali ki ho he fehili na fakamaopopo i lalo o na Tulafono ienei e mafai ke fakalauiloa pe fakailoa ki ho he fakalapopotoga pe he tino e kehe ai i lalo o na Tulafono ienei, pe he tino e heki hainia e ia te takutinoga i lalo o na Tulafono ienei.

(4) Ko na fuainumela fakamaumau aloakia uma e tatau ke fakalauiloa i ni faiga e puipuia ai te matea e ho he tino ni fakamatalaga e patino ki he tino pe he fakalapopotoga vagana ai: (i) Ko te tino tena, pe he tino e gafa ma te fakalapopotoga, kua malie ki te fakalauiloaga

i te auala tena, pe kua uma te tuku atu o te fakatagaga ke fakalauiloa i te auala tena, pe

(ii) Ko te fakalauiloaga i te auala tena e heki kitea muamua e te Tino Fakauluulu o Fuainumela Fakamaumau.

(5) E heai ni fakamatalaga e tuku atu i lalo o na Tulafono ienei e mafai ke fakaaoga ma fakamaoniaga i ho he fakamahinoga, vagana ai i lalo o te palakalafa (2).

(6) E heai he tino na hainia ha na takutinoga i lalo o te Tulafono 7 e mafai ke fakamalohia i ho he fakamahinoga ke tuku atu ni fakamaoniaga agai ki ni fakamatalaga na tuku atu i lalo o na Tulafono ienei, vagana i lalo o te palakalafa (2).

## **12 E mafai e te Tino Fakauluulu o Fuainumela Fakamaumau ke fakailoa ni fakamatalaga**

E kehe ai ma te Tulafono 11 e mafai e te Tino Fakauluulu o Fuainumela Fakamaumau oi fakailoa ni:

(i) Fakamatalaga na tuku atu e he tino pe he fakalapotopotoga e iei ai he maliega tuhituhia ke fakailoa, pe he tino pe he vaega e ia taukikila te fakalapotopotoga;

(iii) Fakamatalaga o na fakafetauakiga o koloa ma fafo, gaoioiga o na vaka ma na vakalele, ma na koloa e fefaiaki i na uafu; (iv) Pepa mo tagata tautokatahi mai na tuhiga igoa a Tokelau o te aofaki o tagata na fale i te 80 tauhaga i tua mai o te taimi na fai ai te tuhiga igoa;

(v) Fakamatalaga maualalo ki ietahi mataeke a te malo, pe fakalapotopotoga tau fuainumela fakamaumau fakavaomalo mo te pogai tau fuainumela, kawai -

(a) Ko te fakailoa atu o na fakamatalaga e fakamaliegia ai na manakoga o na Tulafono ienei, ma

(b) Ko na fakamatalaga kua fakalauiloa e he fakailoa ai ni fakamatalaga e lahi atu nai lo na fakamatalaga e fakailoa e te Tino Fakauluulu o Fuainumela Fakamaumau, ma

(c) E fakatulaga ni fakatatitiaga talafeagai mo te puipuia ma te haogalemu e tuku atu e ho he taki e fakatatia e te Tino Fakauluulu o Fuainumela Fakamaumau ma e malie te Tino Fakauluulu o Fuainumela Fakamaumau i te pogai e talohagagia ai na fakamatalaga, ma

(d) Ko te taukikilaga o na fakamatalaga e gafa ma te Tino Fakauluulu o Fuainumela Fakamaumau.

### **13 Holi o te takutinoga mo te puipuia, pe haogalemu o na fakamatalaga**

Ko ho he tino i te fakataunukuga o ona tiute, fakatinoga, mafai, pe he tulaga i lalo o na Tulafono ienei e holutulafono ma e mafai ke fakahala i he fakahalaga e he ova atu i ni iunite e tolu, pe faigaluega mo te nuku mo h piliota e he ova atu i te 12 mahina, e:

- (i) I te maea ai o te fakatino o te takutinoga e takua i te Tulafono 7, e heki fakatinoa e aunoa ma he fakamatalaga fakatetulafono, ke fakatino ni tiute i lalo o na Tulafono ienei, pe fai he takutinoga hehe ma te mautinoa, fakakupuga, pe ni hakiliga, pe
- (ii) I te fakatinoga o ona tiute, e maua pe hakili ke maua ni fakamatalaga e he fakataga ke kilatou maua, pe
- (iii) E heki mafai ma te mautinoa ke puipuia na fakamatalaga na fakamaopoopo pe na fakaulu ki loto o he pepa na tuku fakatahi e te Tino Fakauluulu o Fuainumela Fakamaumau i lalo o na Tulafono ienei, pe
- (iv) Fakailoa ni fakamatalaga i loto o he pepa fakatumu na fakatumu, pe ho ni fakamatalaga na tuku atu ki te Tino Fakauluulu o Fuainumela Fakamaumau i lalo o na Tulafono ienei.

### **14 Na tino e fakatumua na pepa fakatumu**

Ko tagata uma e tuku atu ki ei he talohaga mo ni fakamatalaga mo te pogai o ho he hakilikiliga tau fuainumela fakamaumau e fai i lalo o na Tulafono ienei e tatau i to latou iloa pito lelei ma te fakamaoni, kafai e manakomia e te Tino Fakauluulu o Fuainumela Fakamaumau, fakatumu ma tuku atu na fakamatalaga e tuha ai ma na fakatonuga e tuku atu e te tino Fakauluulu o Fuainumela Fakamaumau.

### **15 He amanakia pe he talia ke tuku atu na fakamatalaga**

- (1) Ko ho he tino e he ia amanakia pe he ia talia ke fakatumu ma tuku atu na fakamatalaga agai pe manakomia e he pepa fakatumu na lafo atu, pe tuku kia te kilatou e te Tino Fakauluulu o Fuainumela Fakamaumau i lalo o na Tulafono ienei e holutulafono i he fakahalaga e he ova atu i te lua iunite, pe, i he tulaga o he fakalapotopotoga e holutulafono mo he fakahalaga e he ova atu i te tolu iunite.
- (2) Ko ho he tino e fakahala i lalo o te palakalafa (1) e manakomia lava ke fakatumu ma tuku atu na fakamatalaga agai pe e manakomia e te pepa fakatumu na lafo atu, pe na tuku atu kia te kilatou e te Tino Fakauluulu o Fuainumela Fakamaumau i lalo o na Tulafono ienei.
- (3) Kafai i tua mai o te 15 aho faigaluega, ko he tino na fakahala i

lalo o te palakalafa (1) e heki ia fakatumua pe tuku atua na fakamatalaga agai pe manakomia e he pepa fakatumu na lafo ki ei, pe na tuku ki ei e te Tino Fakauluulu o Fuainumela Fakamaumau kua toe hoolitulafono i lalo o te palakalafa (1).

- (4) Ko fea lava e talohagagia ai e te Tino Fakauluulu o Fuainumela Fakamaumau ni fakamatalaga e ofo tauanoa, ko he tino e he ia tuku atua na fakamatalaga ienei e he ko he hoolitulafono i lalo o te palakalafa (1).

## **16 Fakakupuga hehe**

Ko ho he tino e faia ma te mautinoa he fakakupuga hehe, pe tuku atu ni fakamatalaga hehe e manakomia agai, pe i he pepa fakatumu na lafo ki ei e te Tino Fakauluulu o Fuainumela Fakamaumau i lalo o na Tulafono ienei e mafai ke fakahala i he fakahalaga e he ova atu i te lua iunite, pe, i te tulaga o he fakalapotopotoga i he fakahalaga e he ova atu i te tolu iunite.

## **17 Fakakino pe fakaheaoga o he pepa fakatumu**

Ko ho he tino e aunoa ma he fakamatalaga fakatetulafono na ia fakakinoa, huia, kavekehe pe fakaheaoga he pepa fakatumu, pe ni fakamatalaga agai pe manakomia e he pepa fakatumu na lafo ki ei e te Tino Fakauluulu o Fuainumela Fakamaumau i lalo o na Tulafono ienei e mafai ke fakahala i he fakahalaga e he ova atu i te lua iunite.

## **18 Fakalavelave ki te Tino Fakauluulu o Fuainumela Fakamaumau**

- (1) Ko ho he tino e fakalavelave, taofiofi, pe poloka e ia te Tino Fakauluulu o Fuainumela Fakamaumau i te fakataunukuga o te mafai i lalo o na Tulafono ienei kua hoolitulafono.

- (2) Ko ho he tino e hoolitulafono i lalo o te palakalafa (1) e mafai ke fakahala i he fakahalaga e he ova atu i te tolu iunite.

## **19 Fakafoliga**

- (1) Ko ho he tino e he fakagalue e te Tino Fakauluulu o Fuainumela Fakamaumau i lalo o na Tulafono ienei ma i ni fakakupuga, uiga, fakatinoga, pe amio e fakafoliga ko kilatou e fakagalue e te Tino Fakauluulu o Fuainumela Fakamaumau i lalo o na Tulafono ienei, pe fakaaoga e ia he igoa, tulaga, pe fakamatalaga o he tino e fakagalue e te Tino Fakauluulu o Fuainumela Fakamaumau i lalo o na Tulafono ienei e hoolitulafono.



(2) Ko tagata uma e holitulafono i lalo o te palakalafa (1) e mafai ke fakahala i he fakahalaga e he ova atu i te tolu iunite pe faigaluega mo te nuku mo he piliota e he ova atu i te 12 mahina.

## **20 Gataaga o te fakahalaga**

E heai he fakahalaga e tuha ai ma he holigatulafono i lalo o na Tulafono ienei e mafai ke kamata i tua mai o te 12 mahina mai te taimi na kamata iloa ai e te Tino Fakauluulu o Fuainumela Fakamaumau te holigatulafono.

## **21 Holoia**

Ko na Tulafono o Tuhiga Igoa 1961 kua holoia.

## Takutinoga o te puipuia

E takutino e kilatou uma e galulue i te Ofiha o Fuainumela Fakamaumau o te Malo o Tokelau i lalo o te Tulafono 5 o te Tulafono mo Fuainumela Fakamaumau 2013, pe galulue mo pe mo te Tino Fakauluulu o Fuainumela Fakamaumau i lalo o te Tulafono 8 o te Tulafono mo Fuainumela Fakamaumau 2013 ma mo kilatou e fakailoa ki ei na fakamatalaga agai ki tagata tautokatahi, kaiga, fale, pihinihi, pe fakalapotopotoga i te fakamaopoopoga, fakagaoioiga pe ko te fakatulagaga o na fakamatalaga ki loto o ni laulau na fakamaopoopo i lalo o te Tulafono o Fuainumela Fakamaumau 2013.

Ko  
au,.....  
.....

*(Igoa katoa)*

O.....  
.....*(Nuku/Taulaga, Atunuku)*

E takutino ma te fakamaoni ko au e he ko fakailoa ni fakamatalaga e uiga ki he tagata tautokatahi, kaiga, fale, pihinihi pe he fakalapotopotoga, pe ho ni fakamatalaga e mafai ke matea ai he tagata, kaiga, fale, pihinihi, pe fakalapotopotoga na mafai ke tuku fakatahi i toku tulaga pe galuega i te Ofiha o Fuainumela Fakamaumau o te Malo o Tokelau, vagana ai kafai e fakataga e te Tino Fakauluulu o Fuainumela Fakamaumau.

E ko iloa ko te haogalemu ma te puipuia o tagata tautokatahi, kaiga, fale, pihinihi, ma na fakalapotopotoga e puipui i lalo o te Tulafono mo Fuainumela Fakamaumau 2013, ma e fakamautinoa e au e heai he tino e heki fakataga e te Tino Fakauluulu o Fuainumela Fakamaumau ke fakataga ke kikila ki na fakamatalaga puipuia.

E ko iloa ko te takutinoga o te puipuia tenei e hafua ai toku olaga katoa, e ve ona manakomia e te Tulafono mo Fuainumela Fakamaumau 2013.

Haini .....

Takutino i te (nuku/taulaga) ..... i te ..... aho o.....  
20.....